

26 November 2024

1700Hrs

ایوٹننگ گو جری نیو ز بلیٹن مو رخہ 26 نومبر 2024

یوہ آکا شوانی جموں ہے عبید الرحمن تے نصرت چودھری تیں خبر سُنو۔ پہلاں خاص خاص خبر۔

1★ قوم اج آئینی تہاڑو منا رہی ہے۔ سرکا ر نے اس ضمن مانہہ آئینی تہاڑہ غی 75 ویں سالگراہ غا موقعہ و ر اگلا 1 سال تک آئینی تہاڑہ غی تقریبات منعقد کران غو اعلان کیو ہے۔

2★ وزیر اعظم نریندر مو دی نے بھارتیہ آئین غی 75 ویں سالگراہ گا موقعہ و ر عوام نانہہ مبا رکباد پیش کی ہے۔

3★ صدر جمہو ریہ دروپدی مرمو نے 11/26 حملان مانہہ شہید ہوا افراد نانہہ خراج عقیدت پیش کیو ہے۔

4★ تے مرکزی وزیر داخلہ امت شاہ نے کہیو ہے کہ دہشت گردی غے خلاف وزیر اعظم غی صفر برداشت پالیسی نانہہ پو ری دُنیا غے اندر سراپیو جا ریو ہے۔

خبراں غی تفصیل نال پہلاں عبید الرحمن۔

Constitution Day

قوم اج آئینی تہاڑو منا رہی ہے۔ سرکا ر نے آئین غا اپنایا جان غا 75 سال مکمل ہون ور اج تیں 26 نومبر 2025 تک آئینی تہاڑہ غا سلسلہ غی تقریبات منعقد کران غو اعلان کیو ہے۔ واضع رہ جے اج غے تہاڑے سال 1949 مانہہ بھارت غی قانون ساز اسمبلی نے بھارتیہ آئین نانہہ اپنایو تھو اور 26 جنوری 1950 مانہہ یوہ لاگو ہو گیو تھو۔ صدر جمہو ریہ دروپدی مرمو نے بھارتیہ آئین نانہہ اک ایسی سند نال تشبیح دتی ہے جس نال گزرتا وقت غے نال نال مُلک غی مجموعی ترقی تے سماجی انصاف غا کئی بدف حاصل کیا گیا ہیں۔ آئینی تہاڑہ غا موقعہ و ر نوی دہلی مانہہ ”سمویدھان سدھن“ غا مرکزی ہال مانہہ منعقد ہوئی تقریب غے دوران خطاب مانہہ صدر جمہو ریہ نے کہیو کہ سرکا ر نے حالیہ بہراں مانہہ سماج غا تمام طبقات غی فلاح و بہبود

واسطے اہم اقدام چایا ہیں اور اس ضمن مانہ سماج غا کمزور طبقات غی فلاح و بہبود غو خاص خیال رکھیو گیو ہے۔ اُنہاں نے کہیو کہ بُن غریب لوکاں نانہ اپنا کھر بنان واسطے رقم دتی جا رہی ہے اور مُلک غے اندر عالمی سطح غا تعمیری ڈھانچہ نانہ ترقی دتی جا رہی ہے۔ صدرِ جمہو ریہ نے نا ری شکتی وندھن ادھنیم غے تحت خواتین نانہ لوک سبھا تے ریا ستی اسمبلیاں مانہ تخصص ملن ور خوشی غو اظہا رکیو اور کہیو کہ اس قدم نال خواتین مزید باختیار ہو جا ئیں گی۔ نائب صدرِ جمہو ریہ جگدیپ دھنکڑ نے کہیو کہ آئینی تہاڑہ غی 75 ویں سالگراہ دُنیا غی سب تیں بڑی جمہو ریت واسطے اک سنگِ میل غی حثیت رکھے۔ اُنہاں نے مزید کہیو کہ بھارت عالمی سطح ور اپنی ترقی غی وجہ نال الگ پشان رکھے۔ لوک سبھا اسپیکر اوم برلا نے اپنا خطاب غے دوران کہیو کہ بھارتیہ آئین مُلک غا لوکاں غا آپسی اتحاد تے قربانیاں غو نتیجہ ہے اور آئین نانہ تیار کرن مانہ تقریباً 3 سال غی کڑی محنت لگی تھی اور بھارتیہ آئین مُلک غے اندر سماجی تے معاشی برابری غو ضامن ہے۔ اس تقریب غے دوران اک یا دگا ری سکو تے مہروی جا ری کی۔ اس تیں علا وہ بھارتیہ آئین غے متعلق لکھی گئی 2 کتاباں غو وی اجراء کیو گیو۔ سنسکرت تے میتھیلی زبانان مانہ لکھیا گیا بھارتیہ آئین غو وی اجراء کیو گیو۔ اور اس تقریب غے دوران وزیر اعظم نریندرمو دی، کئی مرکزی وزراء، حزب اختلاف غا ممبران، لوک سبھا تے راجیہ سبھا غا ممبران تیں علا وہ کئی دیگر اعلیٰ حُکام وی موجود تھا۔

PM Consitution Day

وزیر اعظم نریندرمو دی نے اج آئینی تہاڑہ غا موقعہ و رعوام نانہ مبارکباد پیش کی ہے۔ اپنا اک سوشل میڈیا پیغام مانہ جناب مو دی نے کہیو کہ آئین قوم غی رہنمائی غو ذریعہ ہے اور بھارتیہ آئین بھارت غی ہزاراں سال پُرانی روایات غو جدید بنانیو ہے۔ اُنہاں نے کہیو کہ اس وقت مُلک اپنی بھرپور صلاحیتاں نال ترقی غی راہ ور گامزن ہے۔ واضع رہ کہ وزیر اعظم اج شام آئینی تہاڑہ غا موقعہ و ر عدالتِ عظمیٰ غی طرفوں منعقد کیا جان آلا پروگرام مانہ شرکت کریں گا اور اُت موجود عوام نال خطاب وی کریں گا۔ اس دوران وے عدالتِ عظمیٰ غی سالانہ رپورٹ برائے سال 24/2023 وی جاری کریں گا۔ مرکزی وزیر قانون ارجن رام میگھوال، بھارت غا چیف جسٹس سنجیو کھنہ تے عدالت غا دیگر جج وی اس تقریب مانہ شامل رہیں گا۔

CJI Consitution Day

بھارت غا چیف جسٹس سنجیو کھنہ نے آئینی تہاڑہ گا موقعہ و ر عوام نانہہ مبا رکباد پیش کی ہے۔ عدالتِ عظمیٰ غی بار ایسو سی ایشن غی طرفوں منعقد ہ اک پروگرام نانہہ موصوف نے آزادی حاصل ہون تیں بعد بھارتیہ جمہوری نظام نانہہ آئین غا کردار و تفصیلی روشنی پائی۔

JK Consitution Day

جموں کشمیر سرکار نے آئینی تہاڑہ غی زبردست تقریبات غا سلسلہ نانہہ وی ہدایات جاری کی ہیں۔ آکاشوانی جموں غا نمائندہ نے خبر دتی ہے کہ آئینی تہاڑہ غا موقعہ و ر سب تیں بڑی تقریب ایس کے آئی سی سی سرینگر نانہہ منعقد ہوئی اور اسے طرح تمام سرکاری دفاتر، تعلیمی اداراں، پی ایس یو ز تے مقامی اداراں غے اندر وی آئینی تہاڑہ غی تقریبات منعقد ہوئی۔ دیہی علاقاں غے اندر دیہی ترقی تے پنچایتی راج محکمہ غی طرفوں وی پروگرام منعقد کرایا گیا۔ جس دوران بڑی تعداد نانہہ لوکاں نے پریمبل یعنی آئین غی تمہید پڑھ غے خوشی غو اظہا ر کیو۔ سرکار غی طرفوں جا ری ہدایت غے تحت ان تقریبات غا فوٹو ویب سائٹ

www.constitution75.com

ور چڑھانا لازمی تھا۔ اس ضمن نانہہ جی اے ڈی غی طرفوں تمام خطائی کمشنراں، محکماں غا اعلیٰ افسراں نانہہ ہدایت جا ری کی گئیں تھیں کہ وے اپنا علاقہ غے اندر اس ضمن نانہہ کامیاب تقریب منعقد کراویں۔

Dy CM Labour Scheme

جموں کشمیر غا نائب وزیر اعلیٰ سربندر کمار چودھری نے مزدور طبقہ غی فلاح و بہبود واسطے چلائی گئی اسکیمیں متعلق بیداری و تبادلہ خیال کرتاں واں کہیو ہے کہ اس طرح غا بیداری پروگراماں نال عوام نانہہ کافی فائدو حاصل وے۔ لیبر محکمہ غا افسراں نال ہوئی اک میٹنگ غے دوران موصوف نے متعلقہ افسراں نانہہ کہیو کہ وے جموں خطہ غے اندر اس طرز غا بیداری پروگرام منعقد کراتا رہیں تا کہ عوام نانہہ ان فلاحی اسکیمیں غی جانکاری ملتی رہے۔ اس تیں علاوہ افسراں نانہہ جا ری پروجیکٹاں ورنیڑویں نظر رکھن غی ہدایت کی گئی۔ اس تیں پہلاں

موصوف جموں کشمیر غا بکھ بکھ علاقوں تیں آیا وفود نال ملیا اور اُن غی مشکلات نانہ سُنیو اور اِن شکایات غا ویلے سرے ازالہ غی وی یقین دہانی کرائی گئی ہے۔

CS Heritage Exhibition

جموں کشمیر غا چیف سیکریٹری اتل ڈلو نے ابھی ناؤ تھیٹر مانہ عالمی یوم ورثہ گا موقع ور کلا کیندر جموں غے زیر اہتمام اک خصوصی ثقافتی ورثہ غی نمائش غو افتتاح کیو۔ اس موقعہ ور خطہ غابھرپور ثقافتی ورثہ تے متنوع روایت ور روشنی پائی گئی۔ نمائش مانہ تاریخی تے ثقافتی اہمیت غا حامل 500 تیں زیادہ شاندار نو دارات غی نمائش کی گئی۔ اس موقع ور خطاب کرتاں واں جناب ڈلو نے جموں کشمیر نانہ اک ایسی سر زمین غا طور ور بیان کیو۔ جھپڑی منفرد چیزاں تیں مالا مال ہے تے نوجوان نسل ور زور دتو کہ عجائب کھرتے یاد گا ر مرکزوں غو دورو کریں تا نجے خطہ غی تاریخی تے ثقافتی ورثہ نانہ بہتر سمجھیو جا سکے۔

Himayat Courses JK

دیہی ترقی محکمہ تے پنچایتی راج گا سیکریٹری محمد اعجاز اسد نے گزشتہ روز حمایت اسکیم غے تحت شروع کیا گیا تربیتی کورسوں غی اہمیت ور روشنی پائی۔ اور لمبی منیا د آلا کو رساں نانہ ویلے سر مکمل کرن غی وی ہدایت کی۔ سیکریٹری موصوف حمایت اسکیم غے تحت کئی پروجیکٹوں غا واگزار کرن خاطر منعقد ہوئی اک میٹنگ غے دوران بول ریا تھا۔ نوجوانوں غی زندگیاں مانہ تبدیلی لیان واسطے حمایت اسکیم غا کردار غو ذکر کرتاں واں موصوف نے کہیو کہ اس وقت تک اس اسکیم غے تحت 33 ہزار 3 سو 77 نوجواناں نانہ تربیت دتی گئی ہے۔ جن وچوں 14 ہزار 4 سو 7 نوجواناں نانہ نوکری وی حاصل ہو چکی ہیں۔ اور اس وقت 8 سو 46 نوجواناں نانہ تربیت دتی جا رہی ہے۔

5th Investor Meet

صنعت و حرفت محکمہ غی ڈائریکٹوریٹ نے جموں غا کنونشن مرکز مانہ سرمایہ کاروں غی مشکلات سُنن تے اُن غا ازالہ خاطر اک باہمی اجلاس منعقد کرایو۔ سرمایہ کاروں غی یاہ 5 ویں میٹنگ تھی۔ اور اس غی صدارت آئی سی غا ڈائریکٹر ڈاکٹر ارون منہاس نے کی۔ اس دوران موصوف نے سرمایہ کاروں غی کوششاں

نانہ سرابتاں واں کہیو کہ جموں خطہ غے اندر نواں مرکزی سیکٹر اسکیمیں غے
تحت 28 ہزار 4 سو کروڑ غو مالی پیکج دتو جا رہیو ہے۔ اور یوٹی غے اندر چل رہیا
ترقیاتی پروجیکٹاں ور سرمایہ کا ری کرن آلا افراد غو وی شکریو ادا کیو گیو۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال نصرت
چودھری۔

26/11 Anniversary

ممبئی 26/11/2008 دہشت گردانہ حملہ غی برسی غا موقعہ ور صدر جمہو ریہ
دروپدی مرمو نے اُن بہادراں نانہ خراج عقیدت پیش کیو، جنہاں نے اُس واقعہ غے
دوران اپنی جان گوائی۔ اک سو شل میڈیا پوسٹ مانہ اُنہاں نے قوم غی جانب تیں
بہادر سکیورٹی اہلکاراں گو شکریو ادا کیو۔ جنہاں نے اپنا ساتھی شہریاں غی
حفاظت واسطے اپنی جان غی قربانی دتی۔ صدر جمہو ریہ نے جان گنوان آلا
سکیورٹی اہلکاراں غا خاندان غے نال یکجہتی غو اظہار کیو تے اس گل ور زور کہلیو
کہ یوہ دن دہشت گردی نانہ اُس غا تمام شکلاں مانہ شکست دین غا بھارت غا
عزم غی یا دہانی غا طور ور کم کرے۔

Shah 26/11

مرکزی وزیر داخلہ امت شاہ نے اج کہیو ہے کہ دہشت گردی غے خلاف نریندرمو دی
حکومت غی صفر برداشت پالیسی نانہ پوری دُنیا نے سراہیو ہے تے بھارت دہشت
گردی غے خلاف اقدامات مانہ عالمی رہنما بن گیو ہے۔ جناب شاہ نے کہیو ہے
ممبئی دہشت گردانہ حملہ غا بزدل دہشت گرداں نے 2008 مانہ اج غے تہاڑے بے
گناہ لوکاں غا قتل کر غے انسانیت نانہ شرمندہ کیو تھو۔ اُنہاں نے کہیو ہے 11/26
گا ممبئی حملوں مانہ دہشت گرداں نال لڑتاں واں شہید بون آلا فوجیاں نانہ خراج
عقیدت پیش کروں، اُنہاں نے ایکس ور بندی مانہ بیش ٹیگ غے نال کہیو کہ
دہشت گردی پوری انسانی تہذیب ور دبو ہے۔ قابل ذکر ہے جے 26 نومبر 2008
ممبئی مانہ 166 افراد ہوا تھا۔

Govt Diaster Fund

مرکزی حکومت نے 15 ربا ستاں مانہ آفات تیں نمڑن تے صلاحیت سازی غا منصوباں واسطے 1 ہزار 1 سو 15 کروڑ روپیاں غی منظوری دتی ہے۔ یاہ منظوری وزیر داخلہ امت شاہ غی قیا دت آلی کمیٹی نے دتی ہے۔ اس مانہ شمال مشرقی 8 ربا ستاں واسطے 3 سو 78 کروڑ روپیہ، جہارکھنڈ تے ہماچل پردیش واسطے 139 کروڑ روپیہ، مہاراشٹر واسطے 100 100 کروڑ، کیرلہ تے کرناٹک واسطے 72 72 کروڑ روپیہ، تامل ناڈو تے مغربی بنگال واسطے 50 50 کروڑ روپیہ شامل ہیں۔ تمام ریاستاں تے مرکزی زیر انتظام علاقیاں مانہ سیول ڈفنس فورس غی تربیت تے صلاحیت سازی واسطے 115 کروڑ روپیہ مختص کیا گیا ہیں۔ یہ اقدامات وزیر اعظم نریندر مو دی غا آفات تیں محفوظ بھارت غا نظریہ غے نال منسلک ہیں۔ جس غو مقصد آفات غا خطرہ نانہ کہٹ کرن غا نظام نانہ مضبوط بنانو تے جان و مال غا نقصان نانہ کہٹ کرنو ہے۔ اس سال ربا ستاں نانہ ڈیزاسٹر منیج منٹ واسطے 21 ہزار 4 سو 76 کروڑ روپیاں تیں زیا دہ غی رقم پہلاں ہی تقسیم کی جا چکی ہے۔

اس غے نال ہی خبراں غو یوہ بلیٹن ختم ہوؤ۔